

REGIONAL NEWS

HEADLINES:-

1. Larsap Dr Hari Babu Kambhampati an vawiin khan India Hnam Pa Mahatma Gandhi piancham puala The Grand Gandhi Jayanti Exhibition, Raj Bhavan kawt tuala buatsaih a hawng.
2. Hnam Pa Mahatma Gandhi pianchamphaphak pualin tukin khan Larsap Dr. Haribabu Kambhampati leh Chief Minister Pu Zoramthanga te'n Pachhunga University College hung chung a Gandhi a lim a pangpar dahin zahna an lantir.
3. CADC CEM Rasik Mohan Chakma leh MDC dang 17-te chuan MNF chhuahsanin ZPM a luh a CADC-ah pawh MNF namthlu a ZPM sorkar siam an tum lai mekin an rilru an thlak leh thut a, MNF an vuan leh ta ni a hriat a ni.
4. Ayushman Bhav campaign hnuaiyah mi sing 5 chuangin an taksa peng hrang hrang, a mamawhte hnena pe turin an intiam.

<><><>

GRAND EXHIBITION

Larsap Dr Hari Babu Kambhampati chuan vawiin khan India Hnam Pa Mahatma Gandhi piancham puala buatsaih The Grand Gandhi Jayanti Exhibition, Raj Bhavan kawt tuala buatsaih a hawng.

Larsap chuan exhibition an buatsaih theih na'na tha thawhtute hnenah lawmthu sawiin Sawrkar laipuia Ministry of Textiles in sumfaia tanpuina an pek avangin lawmthu a sawi a, vawiina exhibition an buatsaih chhan ber chu tualchung thilsiam phochhuahna hun remchang a nih vang leh kut themthiam tak tak ten an thilsiam an zawrhchhuah ve theihna hun a nih thu a sawi a, Swadhesi Movement (mahni siamchhuah ngaih hlutna) inzirtirna atana pawimawh tak a ni tih a sawi.

Larsap chuan ram hmangaihna thinlung pu tur chuan mahni thilsiam ngaihsan leh dah hlut thiam a pawimawh a ti a, India hnam pa Mahatma Gandhi pawhin kut themthiamna leh thiamhnang dehna hmanrua atanga thilsiam chhuah te a ngai pawimawh thin tih sawiin heng hian mi tam tak tan eizawna a siam sak thei a ti a. Prime Minister Narendra Modi pawhin hemi hnungzui hian Atmanirbhar Bharat, Make in India, Vocal for Local rawn chhawpchuakin hei hian mahni tharchhuah ngei hman tangkai thiam chu mi tin inzirtir kan mamawh takzet ani tih a sawi bawk.

Larsap chuan Mizoram chhunga hmun hrang hrang a zinchhuah na ah theihna chi hrang nei tam tak an awm thu sawiin ramdang anga industry lian neilo mahse puanthui leh puantah bakah eitur chi hrang hrang an siamchhuah te leh kut themthiamna te chu eizawna atana hman tlak tak leh rampawna hralh chhuah tlak siam chhuah theihna hmanrua a ni a ti a, hei hian mi tam tak tan eizawna a siamsak ngei a beisei tih a sawi bawk.

Governor chuan tunhnaia Prime Minister in a hawn tak PM Vishwakarma chuan kutthemthiamna hmanga eizawng mekte tan kawng awlsam zawk hawnsak in chi hrang hrang 18 ah cheng nuai 3 thleng loan lak theihin heng te hi bultanna tha tak ani a ti a, eizawna mumal tak hmuh theihna hmanrua a ni tih a sawi bawk.

Larsap chuan Mizo mipuite chu exhibition a an phochhuah mizo siam chhuah te chu ngaisang a, an thlawpzia lantir nan an thil zawrhchhuah te leisak turin a sawm bawk.

Commerce and Industries Minister Dr R. Lalthangliana pawhin thu sawiin tunhnaiah Mizo siamchhuah thil tha tak tak hmuh tur awm chu lawmawm a tih thu sawiin an thilsiam chhuah te ram dang el phaka an tan leh zual theih nana tan la theuh turin a chah a, tunhnai kum 3 chhung velah nasa takin hmasawmna a awm tih sawiin an thil siamchhuah te a ðha tawh em em a, a man pawh tam mahse thilsiam a ðhat phawt chuan mi te'n an lei duh zel tih sawiin ram pawna thawnchhuah tlak ðha tak siam zel turin puantahtute a sawm bawk a ni.

Vawiina exhibiton buatsaih ah hian dawr chi hrang hrang 52 awmin mi 65 ten an thilsiam an phochuah thei a. The Grand Gandhi Jayanti Exhibition vawiina hawn hi a duh apiang tan luh man chawi ngai lovin tlawh theih a ni a, Nilaini October ni 4 thleng huaihawt tur niin nitin zing dar 10 atanga zan dar 7 thleng tlawh theih a ni dawn a ni.

<><><>

GANDHI JAYANTI

Vawiin hi India Hnam Pa Mahatma Gandhi a pianchamphapak vawi 154-na a ni a. Hemi ni pualin tukin dar 7:30 khan Larsap Dr. Haribabu Kambhampati leh Chief Minister Pu Zoramthanga te'n Pachhunga University College hung chung a Gandhi a lim a pangpar dahin zahna an lantir.

Home Minister Pu Lalchamlia; Minister dang – Pu R. Lalzirliana, Pu Lalruatkima leh Pu Robert Romawia Royte te pawh zahna lantir na'n pangpar an dah bawk a. Chief Secretary Dr. Renu Sharma leh Sawrkar hotulu dangte pawhin he hunah hian zahna an lantir bawk a ni. Gandhi a piancham October ni 2 hi United Nations in kum 2005 khan International Day of Non-Violence ah a lo puang tawh nghe nghe a ni. SBI, Main Branch a Gandhi lim dahna thin lai hi siamthat tumna a awm mek avangin, he lai hmun atangin a lim hi PUC Campus ah sawn lailawk a ni.

<><><>

CLEANLINESS WEEK

India Hnampa Mahatma Gandhi piancham pualin Mizoram pumah Faina Hapta chu vawiin khan district hrang hrangah kalpui ðan a ni a, hemi rual hian Faina beihpui thlakna Swachhata Hi Seva chu khar a ni.

Aizawlah chuan tukin khan Chief Secretary Dr. Renu Sharma hovin Aizawl District Level Cleanliness Week hawmna neih a ni a. Hemi pual hian bawrsap pisa a thawkte leh Govt. Comprehensive Model School zir laite'n bawrsap pisa leh a chhehvel tifai-in an hnatlang a, Chief Secretary chuan faina leh thianghlimna chu mihring nun nawmna leh ram hmasawmna nen kal dun tlat anih thu leh sawrkar pawhin faina ngai pawimawhin, khawtlang nuam, ram nuam kan siam theih nan hetiang hun te hi inhriathriatna hmanrua atan buatsaih a nih thu a sawi a. Mahni leh midangte tan malsawmna nih tum zawk tur a ni, tiin zir laite leh kalkhawm dangte chu a chah a ni.

Lunglei ah chuan Faina Hapta hi Lunglei Bawrsap Pi Ramdinliani chuan khuallian niin a hawng a, Swachhata Hi Seva kalpui mekah Lunglei District chhunga thingtlang hmun 11-ah hnatlang huaihawt niin khawpui chung hmun 6-ah an hnatlang tih sawiin faina lamah tunhma ngaihtuahin hmasawn mahse theihtawp chhuah zela thangthar zawk ten faina lam rilru pu thar turin a duh tih a sawi bawk.

Siaha ah chuan tukin khan Bawrsap Pu Lalhmunsanga Hnamte kaihhruai-in hman a ni a, bawrsap chuan Swachhata hi Seva hlawhtling taka hman a nih theihna tura thawktu zawng zawngte inpekna fakawm a tih thu tarlangin Siaha

mipuiten Faina Hapta chu hlawk taka hmanga inthlahdah mai lova faina lama hmasawn zel turin kum tin a thar a tanlak zel a pawimawh tih a sawi.

Kolasib-ah chuan Faina Hapta hi Bawrhsap Pu John LT Sanga chuan hawngin mi ropui apiangin faina an ngai pawimawh a, ram changkang apiang an fai thin, a ti a. Kolasib District chu State kawtchhuah a nih angin ram hmel lanna a ni a, pawn lam atanga lo kalte leh District danga mite tan pawha faina kawnga entawn tlak ni tura tanlak a tul tih sawiin Kolasib District mipuite chu faina kawnga theih tawp chhuah zel turin a sawm bawk.

Serchhip district-ah chuan khawpui chung leh thingtlangah pawh hma lak mek niin, Serchhip khawpui chung VC thenkhatte chuan kar liamta Inrinni khan Faina hnatlang hi an lo tawh a, vawiin lamah khawpui chung VC thenkhatte ten Faina hnatlang hi ko ve lehin, Chhengkaw tin atangin mi pakhat zel an thawk chhuak a ni.

Lawngtlai ah chuan Faina Hapta hi DC pisa tualah hawn niin NSS, Government Region Higher Secondary School zirlaite he hun ah hian an tel a, Khuallian LADC a Executive Member Pu C. Rongura, chuan fai chu mahni theuh atanga intan tur a nih thu leh fai duhna chu kan nunphung a bet tlat tur a nih thu a sawi a. Fai leh thianghlimna ngaina mi ni tur chuan ruihtheih thil, zuk leh hmuam lakah taksa vawn thianghlim a pawimawh thu a sawi.

Mamit ah chuan DC Pu VL Remliama hovin DC Complex ah hman niin DC chuan Faina chu chungkua a tanga tan ngai a ni a, chu chuan khawtlang fai leh ram fai a thlen dawn a, kan balh viau chuan kan la changkang tawklo a ni a ti. Mamit District mipuite faina kawngah midangte entawn tlak ni tura tan lak a tul thu a sawi bawk.

<><><>

POLITICAL VOLTE-FACE

Chakma Autonomous District Council (CADC) CEM Rasik Mohan Chakma leh MDC dang 17-te chuan MNF chhuahsanin ZPM a luh a CADC-ah pawh MNF namthlu a ZPM sorkar siam an tum lai mekin an rilru an thlak leh thut a, MNF an vuan leh ta ni a hriat a ni.

Chief Minister leh MNF president Pu Zoramthanga chuan social media a twitter account an tih thin, X an tih tak, hmangin vawiin chawhnu khan he thu hi a puang a. Pu Zoramthanga chuan Rasik Mohan Chakma leh CADC a MDC-te MNF party a rinna an nghah thar leh avangin lawmthu a hrih a. MNF a rinna an nghah thar leh chhan hi thil ropui tak a ni a ti a. MNF party mite zawng zawngin an lo lawm thu leh an hun lo awm zel tura a duhsakna a hlan bawk a ni. Rasik Mohan Chakma leh amah zuitu MDC-te hian September ni 29 khan Chakma District MNF President hnenah MNF party a an nihna chelh theuh leh party member an nihna atanga an ban thu an hming ziak hnanin an pe a. MNF general headquarters President hnenah a copy an pe bawk a.

Hei bakah hian CADC-a MNF sorkar namthlu a ZPM sorkar din an tum thu hi an puang bawk a. Nimin thleng kha chu chu an dinhmun a ni a, vawiin lamah thil a inthlakthleng ta thut niin a lang a. A lungawi loh chhan ber Tuichawng biala MNF candidate atana midang an ruat chungchang chu engtin nge MNF party hotute'n an chinfel tih tun dinhmunah hriat theih a la ni lo.

<><><>

PLEDGE TO DONATE ORGANS

Ayushman Bhav campaign hnuaiah mi sing 5 chuangin an taksa peng hrang hrang, a mamawhte hnena pe turin an intiam. He campaign hi thla hmasa khan President Droupadi Murmu-i'n Gujarat-a Gandhinagar-ah a hawng a, he campaign kal tlanga midangte tana an taksa peng hlan turin Union Health & Family Welfare Minister, Dr. Mansukh Madaviya-a'n ram mipuite a ngen a ni.

Akashvani Corr sawi danin, mipakhatin a thih hnuah a taksa peng pawimawh kal, thin, chuap, lung leh mit darthlalang, hmangin mi 8 tan nunna thar a pe thei a, kum 10 kalta chung khan midang tana an taksa peng hlantu hi a let thum chuanga pung chhovin tunah chuan kum tin, mi sing 1 sang 5 chuangin midang tan an taksa peng hrang hrangte an hlan a ni.

<><><>

CBI ARRESTS 4 ACCUSED

Manipur-a tharum thawhna thleng kaihnawia thubuai hrang hranga inhnamhnawiha puh mi 4, Central Bureau of Investigation (CBI)-in an man. State sorkar ngenna bawh zuiin CBI hian kumin Aug thla khan thubuai 2 an ziak lut a, hemi hma lam hian Manipur Police-in Lamphel Police Station-a thubuai an thehlut a ni.

Manipur Chief Minister N Biren Singh-a'n nizana thuthar lakhawmtute a hriih danin, pawisawilo zirlai 2 rawng taka thahnaa inhnamhnawiha puh mi 4, CBI Special Team-in an man a ni.

<><><>